

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Munir. A. Azim (atba)

21 Février 2020

26 Jamadi'ul Aakhir 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Bane Attributs d'Allah

Alhamdulillah, pareil couma mo ti dire zot la semaine dernière mo pou commence ene série Khutba lors bane Attributs d'Allah. Avant ki mo ti commence prépare sa Khutba là plusieurs semaines de cela, comme d'habitude mo faire *duah* avec Allah et ene sel coup Allah faire moi comprend ki bizin cause un peu lors So bane Attributs et sa c'est ene grâce d'Allah ki à chaque fois ki arrive Vendredi kot pou bizin faire le Khutba Jummah, Allah (swt) guide moi lors ene sujet. Tous sa là c'est bane manifestations et bane signes d'Allah couma Allah (swt) dirige So serviteur Choisi. *Alhamdulillah*.

Donc, séki Allah (swt) faire moi comprend, peut-être avant aussi Allah (swt) de par So grâce ki Li faire lors So bane prophètes, So bane Choisi Li montrer zot bane même explications, à cause sa même nous dire ki bane Messagers d'Allah zot couma ene la chaine, so maillon accrocher avec l'autre maillon là, li aller même kot l'heure là nous dire li ene la chaine, mais pou faire sa la chaine là vine pli joli, pli attirant et li briyé kot la chaine là aussi gagne sa valeur là, bizin ena sa médaille là. Donc, sans médaille là, la chaine là pena so vrai valeur et li perdi tous so splendeur. Donc, tous bane prophètes d'Allah nous ene seul famille ki cause

même parole, faire revivre vrai valeur de chaque prophète ki Allah (swt) fine envoyer lors sa la terre là et tous bane prophètes faire revivre vrai valeur de chaque prophète ki Allah (swt) fine envoyer lors sa la terre là et tous bane prophètes nous regroupe nous derrière nous chef-maître. Et le chef-maître de tous bane prophètes c'est Hazrat Muhammad (saws).

À cause sa même avec so venue et avant aussi, bane prophètes ki ti vini avant li, fine faire so éloge et prophétise lors so venue, pou ki nous conne so valeur et grandeur, kot so venue englobe tous bane l'enseignement divine ki ti apporter ou exister avant par bane prophètes (as) avant li. À cause sa même ki Quran fine dire nous ki Hazrat Muhammad (saws) li le *Rahmat-ul-lil-Aalameen*; ene bénédiction pou tous l'univers, pou zot tous et so message et religion ki li fine apporter, li pou toute l'humanité en entier. Et pou donne vrai valeur de sa médaille là kot tous le temps li pou reste briyé, jolie, attirant, à chaque fois bizin ene quelqu'un vini de côté d'Allah pou faire revivre So bane l'enseignement pure, véridique, kot péna aucaine innovation ; ene tel l'enseignement kot pou amène directement vers ene seul Dieu et pou gagne l'amour de Dieu.

Donc, voilà maintenant nous guette ensemble Bondié So bane attributs: kan ou guette tous bane attributs d'Allah, sa bane attributs là prend zot source de sa quatre attributs principale ki trouve dans Surah Al-Fatiha. Kan ou guette certain attributs, couma **Hamid**, li pas lier avec les quatre attributs ki mentionner dans Surah Al-Fatiha, c'est-à-dire : *Rabbul Aalameen, Rahman, Rahim* et *Malik-e-Yawmid-Deen*. Mais faudrait pas oublier ki le Surah Al-Fatiha fine commencer avec *Hamd*. Et l'attribut de *Hamd* ena ene liaison égale avec Allah et bane les autres noms d'Allah. Li directement lier avec tous les quatre attributs là d'ene façon égale. Et dans la langue Arabe li parfaitement correcte pou faire le mot *Hamd* applique dans ene façon égale à tous les quatre attributs.

Donc au lieu ki servi le mot *Hamid* fine servi le mot *Hamd* à la place, ki ena connexion avec tous sa bane attributs là. Et sa ti nécessaire aussi parski n'importe ki attribut ki privé de *Hamd*, li pas pou ene attribut complet et parfait parski le sujet de *Hamd* même demander ki ene chose complètement pure et tout mal disparaite. Donc, *Hamd* c'est ene sujet bien vaste et bien profond et façon ki fine servi li dans Surah Al-Fatiha, ena tout so bane pureté là-dans. Donc, celui ki *Rahman* mais ki pas *Hamd* veut dire ki bizin ena certaine manquement dans li. Li pas digne de tous éloges. Et dans le monde nous gagne beaucoup de sa kalité

Rahman là ; bane ki dépasse tous limites dans zot pitié, ki pas garde aucaine balance. Par exemple bane mamans ki sitant content zot bane garçons, zot gâte bane garçons là. Donc kan même n'importe ki attribut bon couma li bon, tant ki attribut de *Hamd* pas appliquer parfaitement lors li, bé bizin ena quique manquement dans attribut là. Donc, Surah Al-Fatiha fine montrer ki le mot *Hamid* appliquer lors tout bane noms d'Allah. Sans sa pas capave même ena ene conception de quique attribut d'Allah.

À part sa ena encore d'autres attributs ki si ou chercher, ou pou trouver ki zot ena profonde connexion avec bane attributs de Surah Al-Fatiha. Et si Allah (swt) donne sa *Tawfiq* et clairvoyance là et si Li donne sa connaissance là du ciel, bé à ce moment là, ou pou trouver ki péna zis ene attribut ki fine mentionner dans Surah Al-Fatiha. Si nous guette attribut *Al-Haqq*, li ene tel nom d'Allah ki faire Allah personnifier la vérité. *Haqq* veut dire la vérité. La vérité li nek ene attribut mais kan nous dire *Al-Haqq* bé li veut dire ene tel Être ki péna nannié d'autres ki la vérité. Pli haute introduction ki ou capave faire pou la vérité li inclu dans le mot de *Al-Haqq*. Maintenant la question ki poser c'est ki : Kot fine mentionne le mot *Al-Haqq* ici? Dans sa quatre attributs là kot fine mentionne Allah comme étant la vérité?

Donc, dans sa contexte là mo envie mette certaines choses devant ou. Li pas ene débat de connaissance mais li nécessaire ki nous réfléchi bien lors nous connexion avec Allah et So attribut de vérité pou ki nous crée ene profond vérité dans le Jamaat, pou ki nous adopté sa attribut là dans nous.

Quand ene dimoune analyser, li pou trouver ki faire li cause menti. Et kot-kot li gagne bane cogner li pou conner ki sans ki li établi so connexion avec Allah Le Véridique (*Al-Haqq*), bé li pou priver de bane faveurs Allah. Kan sa sujet là pou vine bien clair, bé de part zot même bane dimounes pou comprendre et pou faire bane efforts pou augmente zot niveau de vérité. Parmi bane raisons ki faire bane dimounes cause menti, ene c'est ki à cause zot cherche bane fausse éloges. Bane dimounes ki content éloges, ki content flatterie et ki pas gagne sa, zot commence cause menti. En parlant de sa sujet là, dans le Quran Shareef dans le Surah Al-Imran, Allah (swt) dire bane dimounes ki content gagne éloges ki insister ki flatte zot pou bane zaffaires ki zot pas fine faire, zot adopter le mensonge. Donc, beaucoup de raisons derrière le mensonge c'est à cause le désire de gagne bane éloges.

Donc, kan ou pé dire *Alhamdulillah*, bé en même temps ou pé déclarer ki Allah (swt) Li ene tel Être ki pas bizin aucaine mensonge pou gagne éloge parski tous vrai et tout meilleur éloge appartenir à Allah même. La racine de mensonge même enlever nette. Pas capave même concevoir le mensonge en connexion avec éloges d'Allah. Sinon li pou vine ene sujet contradictoire. Mais bane dimounes, puisque zot pas maître de *Hamd*, zot pas possède ene *Hamd* parfait, bé zot adopter le mensonge pou éloigne zot bane manquements, zot bane faiblesses et zot raconte bane beautés imaginaires pou zot attire bane fausses éloges lors zot. Ou sois zot content ki bane les autres raconte bane zaffaires imaginaires lors zot.

Sa bane zaffaires de fausse flatterie là, sa bane applaudissement là, tous sa bane zaffaires raconter concernant bane zaffaires imaginaires là, tous sa là c'est bane mal ki fine empoisonne la société. Ou capave réfléchi lors là, ou guetter et ou capave applique sa lors tous bane désordres que cesois au niveau familiale ou d'autres, ou pou trouver ki juste pou gagne éloges, bane dimounes cause tellement de bane mensonges ki sa alle fini en bane désordres, bane bagarres. Et lerlà ene tel dimoune li perdi so propre dignité. Ler li causer aussi bé bane les autres dimounes tourne zot figure ene côté et dire ki li pé juste blaguer et raconte bane faussetés. Banes dimounes fini conner ki li habituer flatter etc., et ene tel dimoune li perdi so l'honneur avec so propre zenfants.

Ene quelqu'un fine raconte moi dans ene place, ti ena ene réunion et ti ena beaucoup dimounes, alors ene missié fine commence causer et so propre garçon aussi ti dans sa réunion la ; li fine tourne so figure ene côté et faire signe ki so papa pé juste blaguer, pas prend li compte. Donc, par so propre zenfant, li perdi so l'honneur. Bane dimounes comme sa zot gagne bane fausse l'honneur et si zot gagner aussi, li pou quelques jours seulement parski la vérité pas capave cassiette kot li (la vérité) pou bizin éclater et pou trouve sa kalité dimoune là so bane faussetés, kot li ti pé vivre so la vie dans imagination.

Pou azordi mo arrête là-même. *Insha-Allah*, la semaine prochaine mo pou continuer lors le même sujet. Ki Allah béni zot tous et donne zot la capacité pou comprend le sujet de sa Khutba là et zot réfléchir en zot sa bane qualité, sa bane attributs d'Allah là afin ki zot progresser spirituellement et matériellement dans sa la vie ici-bas là et dans Aakhérat. *Insha-Allah, Ameen.*